

北 泉 草 堂 遺 稿

目 錄

本傳

記

員山里記

墓誌銘

明賜進士第陞授奉政大夫工部都水司郎中周務齋公墓誌銘
奉政大夫廣西按察司僉事竹庵吳公墓誌銘

墓表

大明武昌府通判懶齋周公墓表

詩

貞節莫孺人三首

目 錄

北 泉 草 堂 遺 稿

目 錄

送周清溪先生福州司訓

哭周岳父追憶前事并序

過丈人墓有感而作

挽冬官周務齋先生三首

游峰歎

立鶴篇

樵溪行送鄭一鵬給諫

贈竹園隱者

七夕立秋值雨

游滴水巖

送諸生小試遇雨

秋日 王龍津觀物園

呂梁洪

北 泉 草 堂 遺 稿

春日阻風部中限韻

陳子達院中賞榴限韻

晚霽謁張永南翰讀歸復簡此

聞警和願心新三首

病中立秋

樂耕堂

倭犯鍾司徒墓雷震遁去

題峽山飛來寺

貞節周母莫孺人

午日卓明堂議修築北冲河口

北 泉 草 堂 遺 稿

目 錄



四

本傳

北 泉 草 堂 遺 稿

林士元。東洋人。字舜卿。正德庚午鄉薦。甲戌進士。授行人。冊封唐藩。饋金六十錠。卻不受。王深器之。乙酉擢南京戶科給事中。劾光祿少卿史俊。怙勢殺人。都御史汪鉉。考察不公。併劾罷內外不職者數十人。仕路一清。先後陳時務數十疏。皆極剴切。壬辰擢湖廣副使。備兵衡永。江華流民。與士戶爭田。搆兵連年。禍延諸郡。士元單騎往諭。爭遂息。吏部郎中。鄧尙義之弟。挾制守令。侵牟里黨。按以法。轉廣西參政。分守蒼梧。戊戌征大藤峽。士元督餉紀功。有賞勢子弟希報功次。絕不假借。捷奏。擢浙江按察使。未赴。以憂歸。遂不起。祁桂林名宦。嘉通志晚年家居。時或戴笠躬耕。鄉人賢之。所著有學思子中庸。孟子衍義。讀經錄。讀經附錄。孔子世家顏子列傳論。北泉論草。及文集十卷。祀鄉賢。阮部志

員山里記

北 郡之南百里許。有員山地。形勢員如布棋。如運規。屈曲盤旋。故曰員山。或曰其山多緩。故取以爲名。非也。嘉靖初撫軍談公巡行方岳。適我瓊邦。經歷茲土。里中士大夫冠蓋相見者。不下十百。公曰此何地耶。人文若此其楚楚耶。稱贊久之。究其始終。乃云二族兄弟團居於此。不禁鼓掌大笑曰。吾巡視多矣。未有若員之文士接踵。官員濟濟如此里也者。而員山之名。遂相傳至今。按員山形勢高爽。向背合局。遠而望之。隱隱然陂陀。自金牛山下。略大江而止。金鷄貴人。排衙列旛。文筆峯掩映指顧間。俯而視焉。縈迴盤繞。中有巨塘。長廣百畝。雜以荷花。魚蝦不可勝食。塘之外爲石麓坡。起西轉東。迤南直北。二里許。稍內屈而止。南以西有麓寬平。爲徑口。族人居之。有祖曰潔。開科於此。西以北爲上山。有嶺曰山樵。蓋村主山也。高數丈。勢如常蛇。連延數十里。巖石峻絕。又北而東。與麓對峙。爲下山。草木繁植。松竹尤多。禽獸比昔雖減去八九。而狐兔鷓鴣梁鹿野治之屬。未嘗不

北 泉 草 堂 遺 稿

有。故一時芻蕘古蓋畜牧祭祀之用。多取給於此。嶺下有水田數十頃。源泉湧出。遇旱則決泉以灌之。水利甚溥。塘之尾有井曰甘泉。味甘而色清。飽飲而不飲。其腹有長橋臥波。外接石麓。爲社學。內築菱角池。員之俗歲時伏臘。祈報登科。飲畢唱和爭。以詩對相尙。邑宰朱公嘗見臨而盛稱曰。小吉安汝南周氏自四世祖宋進士渠公開基於此。迄今十餘世。族大繁衍。科甲聯芳。仕宦不絕。孰非乃祖之所賜。郡誌云。地雖小而巧水環徑通周氏居之。讀書策仕接踵族夥而聚雖簪笄疊疊偏側甚於閭閻終不舍而他遷詩曰。敦彼行葦此其敦之謂哉。

明賜進士第陞授奉政大夫工部都水司郎中

周務齋公墓誌銘

歲乙未九月十九日。工部郎中務齋周公。以疾終於員山之正寢。元歸自湖廣憲臺。既撫其棺而哭之。再四年戊戌。歸自廣西省。則又哭之。其從兄弟來北泉草堂。言曰。亡弟所以停棺未葬者。待子玄室之銘也。予與務齋生同里閭。辱在瓜葛。進身同年。仕同朝。志且莫逆。銘惡可辭。謹按狀公諱宗本。字立之。姓周氏。號務齋。先世閩人。自始祖翰林學士來瓊。居秀梅里。三世祖致政公。來居員山爲吏洋里。正世躋科第。公高祖諱淋。曾祖諱悅。祖諱昇。皆隱居不仕。父諱奇儂。封工部郎中。母王氏。封太宜人。以成化乙巳年十一月二十六日生。公有奇節。稍長類悟絕人。授義經。旁通詩書禮記。遠近以神童目之。然大志圖步。不屑進取。從父靖江縣尹奇健。督而教之。使從事舉業。十七歲以儒士應辛酉鄉試。張參政合省選士。擇其最者四人。

北 泉 草 堂 遺 稿

以示於衆曰。奇才奇才。公與吾瓊張進士世衡。博羅鄭御史維新。其一人則予忘之。是秋張果發解。公還中丁卯舉。再試中甲戌禮部唐梟榜進士。授溧陽令。邑居京輔。多豪右。公苦節秉法。無所吐茹。撫按交薦其賢。以風憲召入京。舟行河挽卒。與貴有力者爭道。爲其所銜。授南京工部都水司主事。差抽蕪湖竹木。畢力剔蠹國。計倍於昔。還管部事。署郎中。以疾告辭。賜歸。調理者八年。蓋公以一親垂老在堂。因此爲終養之計也。一日封翁厲聲曰。聖明在上。鄉里賢俊。後先飛騰。拖金衣紫。吾非人心。不願有此耶。汝欲待我以死。我即不食矣。公惶懼無以應。即束裝赴部。復舊職。陞都水司郎中。時南京工部。歲課所入。惟蘆洲爲盛。而貴族閹寺。相倚奸利。尙書石湖何公。特疏公名於朝。奉璽書行事。公按其尤者數家。寘於法。奪其利還之民。莫不搖手相戒曰。迴避新蘆洲也。善政屢騰。朝廷特旨宣慰。陞奉政大夫。晉爵營繕司郎中。居無何封翁訃至。公奔喪歸。讀禮旣逾祥禫。則自喜曰。昔之出逼於父命。今供菽水於母氏之旁。尙有何言哉。再逾年疾作。遂不起。

得壽乎有一。室曾氏。封宜人。無子。側室生女三。長適胡方伯之孫焯。次適舉人陳世美之子傳燮。俱太學生。三則予仲子禮部儒士樂之也。公賦性剛介。遇事敢爲。取予一毫不苟。家居惟讀書課農事。足跡不涉府城。善詩。有唐人風致。酒後輒豪吟數首。遇敵者聯唱。或通宵不寐。文有氣格。多不留稿。公卒後從子忠檢笥中得若干篇。錄藏於家。銘曰。

北泉章堂遺稿

茂質清操。博學強記。厥德不回。浩然正氣。稠人之中。耿耿持議。如倚危樓。俯瞰平地。科甲蜚英。盤錯別利。官輒所之。民安吏忌。強者見鋤。柔乃有恃。士論推公。遠大之器。仕而不仕。愛日愛志。不仕而仕。勉承親意。金紫雖榮。不如融泄。若人者儔。漢賢毛義。天不佑賢。奪之胡遽。奪之酷矣。復艱其嗣。梁山之西。川原蒼翠。爰卜幽巖。於此焉瘞。崇土爲墳。刻石以誌。作銘者誰。北泉友弟。

奉政大夫廣西按察司僉事竹庵吳公墓誌銘

序井

吳公諱天挺，字人豪，號竹庵。先閩人曰霖者，仕宋爲評事。謫居瓊之澄邁。越五世曰邦用者，由澄邁卜居於定安之潭覽村。遂爲潭覽吳氏始祖。其後曰偉，字彥奇者，由歲貢補太學生。是生灝，字子明。由歲貢授昌化訓導致仕。卒贈文林郎。荊州府推官。室葉氏。贈孺人。公於賓州守孟傑慶遠府推官。孟稱皆稱伯仲也。生四子曰天啓、天河、縣教諭。次即竹庵。次天賜。次天成。公少與教諭隨任讀書。並驅英俊。選補昌化學真膳生。弘治乙卯鄉試。公以養經被薦售。中春官乙榜。辭不就。卒美北雍。舉人岑英客死京邸。富家子也。公携喪與篋金還其子。牽涉無所私。公歸與從兄湘陰尹廷宥。治通士業。至廢枕席。辛未甲戌連下第。選湖廣荊州府推官。公至決獄如老法吏。尋視篆郡。當州湖之衝。供億繁數。日覩宗室祿數日增。民弗堪命。公措理有方。政通民和。巡按御史陳君則薦其才堪大用。工部侍郎劉公以建營至都憲。東湖吳公以賑飢至。檄公分行諸郡。吳公尋薦爲御史。今都憲東塘毛

北 泉 草 堂 遺 稿

緒

八

公。委公署江陵縣事。批曰江陵衝要。罷撤之甚。非大才如某。不足以治之。其往治仍不妨府事。俾弊政釐革。流移招邊。新尹卽來踵成之。是爲新尹師也。平生所學何負哉。毛公則又薦之。初陳君於郡縣佐貳獨薦公一人。頗有里閭之議。至是輿論帖服。居二載。當考最。御史何君鼐表其政績卓異。宜褒示其位。朝議從之。遂有勅命之錫。先考贈君推官。暨妣孺人。今所推恩也。公進階文林郎。配王氏。縣博士濂師周之女也。封孺人。蓋異數焉。尋陞南京太僕寺寺丞。修馬政。又三年秩滿。吏部引奏。取旨復職官。上官例不考覈也。歲嘉靖乙酉冬。擢廣西按察司僉事。奉璽書整飭左江一道兵備。兼理分巡事。時土酋岑猛作亂於田州。都憲東臬姚公。奉令總制軍務。檄公與參將沈希儀以兵守南寧。塞交趾之通。事平。當上功。會有言斬岑猛非真者。東臬被謗去。陽明王公以尙書繼提督。偵猺寇起平南。檄公調度軍事。與張參將經。共擒斬一千二百級。列縣底寧。而公亦以人處兵間。冒暑雨致疾。疏乞骸骨。得俞旨致仕還鄉。陽明大書歸去來兮辭贈之。且相期云報功在

北 泉 草 堂 遺 稿

邇。再起有日。君疾其弗藥。會陽明亦下世。事遂寢。是爲戊子七月也。公歸
護藥蕭然。如未官時。乃就先人舊莊。導泉爲田。得二百畝。結草墩課諸子
孫。爲終焉計。越五年癸巳。以疾終。距生於成化庚寅二月三日。得壽六十
有四。子男四方升喬升俱庠生。同升陰陽訓衛。出王孺人。次升尙幼。出側
室楊。女三長適義官周炯。次適周世和。三選何子元。俱庠生。孫壽齡、富齡、
康齡、元齡、紹齡、泰齡、益齡。凡七八。壽齡稍長。文遊邑庠。餘俱入小學。孫
女長適庠生曾遜。方升於乙未年。葬公於石豆都龍供奉下。公學旁通星歷醫
卜及堪輿家。無不精到。龍供之藏。從公志也。方升與壻世和。奉省魁許益
光所爲狀。過北泉請銘。予哭焉。且言曰。吾鄉里論竹庵。類以鸚鵡之英。至
方面大夫。榮矣。而孰知其志節有高於此者乎。公素與廖太宰龍灣公文會
甚密。每過束光必畱止數月。後龍灣入掌銓衡。人謂公赴選。必得高官。公輒
不應。其自荊州考績至京也。龍灣爲吏部侍郎。會急缺試風憲。公稱疾不赴。
及得寺丞之報。公喜曰。寺丞吾無嫌矣。左江亦如李廣老而得當單于者歟。

東臬陽明。周旋軍旅間。幾三年。而皆及表其功勳而止。夫以公之敏才。而發科又甚早。使其先數年以仕。後數年以歸。雖循實可至通顯。而左江樹立。在人耳目。肯一效世俗自敝陳。亦將增秩木艾。而公固義命自安。聽其止而休焉。嗚呼其亦偉矣。予非爲區區者計。願惟以山川生才。將以供世用。用而不竟其所施。固亦山川之所甚惜也。予痛惜而銘茲藏也。敢私乎公哉。銘曰。已乎竹庵。山川孕才。樟須作棟。龍豈隨吟。學淹經藉。爰及星卜。識裕兵刑。不遺錢穀。撥科則早。登仕孔遲。藏器靡珍。利用曷施。沛然作雨。出牧荊州。地勞心逸。裁剝如流。于泐之馬。亦曰颺颺。孰秉淵深。作配伯回。猗彼潯南。危然後安。公存賊沒。單騎霜寒。拂衣勇退。急流之中。道惟直已。口不言功。綠野之陰。黃精白飯。謂鶴宜長。而龜何短。有盡者生。不磨者名。大夫孫子。清白斯繩。嘉靖十五年丙申

北 泉 草 堂 遺 稿

大明武昌府通判懶齋周公墓表

瓊山之西南。百里之遠。有岡曰莫寅。左右環侍。背屏山而臨曲池。首卯而趾酉。屹然崇四尺於其間者。湖廣武昌府通判懶齋周公之墓也。既葬臨十年。其仲子筌箴。奉年譜且述公遺命。以墓表屬余。余不敢辭。謹案譜公諱賓。字廷重。號懶齋。先世莆田人。宋季有寓於瓊。卒葬邑西秀梅里。題其碣云有宋學士周七官之墓。失其諱。七官子孫。世居東洋里員山村。蕃衍而業儒。與公同年者。靖江尹奇健。後公登第者。工部郎中宗本。戶部主事世昭。諸以科貢登仕者尙多焉。高祖諱孔琛。曾祖諱濟。祖諱昇。正統間以經禮中邱文莊榜。有學行。文莊久敬而善交焉。考諱學文。屢以儒士應舉教讀。鄉閭多所成就。妣賓州守孟傑之妹。以成化元年六月甲子日生。公穎悟有奇節。稍長。父母以祖經授之曰。此吾先壘莊文藝也。有族伯曰某者。建塾延師。自任供饋之費。而省督諸子弟尤嚴。禁家務不以相及。故公得專志於學。治舉業卓有成效。歲二十二。領成化丙午鄉薦。第二十三名。應庚戌

北 泉 草 堂 遺 稿

禮部會試。中乙榜。署詔之曲江學訓導。邑故張文獻之邦。而近時科第落落。公督率學序。課程不怠。弟子鄧元唐風。並以禮經魁省闈。人謂傳衣鉢之功也。踰八載。丁太夫人憂。喪葬依古禮。不用浮屠。服闋。又二載。以儒士尊翁垂白在堂。不忍遠離。尊翁告之曰。汝有二弟侍終。吾望汝祿養。安得遲遲。公恐懼就道。會試新例。遠限革黜者衆。公以先十日謁部無罪焉。會試再不第。適丁儒士公憂。喪葬如夫人禮。鄉人多效慕焉。制終赴部。改訓三河縣學。三月通考九年績稱最。陞桂林府推官。讞獄詳明。承委多勞勩。撫按交薦。陞武昌府通判。督徵勤敏。廉介不私。被薦亦如廣西。一年以疾告。二年再告。撫按察其志不可留。聞於朝。上准致仕。是爲正德甲戌歲也。公既歸員山。明農講學。教誨子弟。足跡不至城府。與鄉人居。退讓以明禮。取予毫末不苟。尤善珍攝。勿藥而有喜。壽八十有一。考終正寢。是爲嘉靖二十四年乙巳歲三月二十八日也。配宜人海氏。御史澄之族。貞吉宜家。先公卒。葬並佳城。子二。管筌箴。二女。長適澄過貢士吳縉。次適梁老蔡。

北 泉 草 堂 遺 稿

乾清。孫三。澎滋沂管筮。澎滋俱府學庠生。箴以例補授定安縣陰陽學訓。衍沂尚幼。是歲縣庠改造文廟落成。俎豆一新。諸士議公祀於鄉賢。呈府縣並達督學使者。待報舉行。公而判巨郡。皆會鑿錯別利器之所。樹立有效。而年譜出自公手著。不欲自矜。弗能追敘其詳。憶予憲副之日。聞武昌之民生祀之。暨參廣右。則拜公於名宦祠。因自歎曰。忝憲兩藩。寧不於公是愧乎。嗟乎二邑之人心。固不可誣。而公之實政實德。自有不可掩者哉。抑予讀撫院西軒陳公薦疏未云。以上各官俱賢能。而其中周賓吳越爲最。乞不次擢用。夫天下士於兩廣數百人矣。而二公褒然首稱。況令名而有終乎。是可敬矣。吳公端人也。初尹武昌有聲。晋太平思恩通判同知。嘉靖初邊夷屢變。桂文襄在吏部。以咎坐守長。多易置焉。特陞吳公爲工部郎。尋以光祿寺少卿致仕。南京榮之。湛祭酒甘泉。盛學士程濟。倡爲詩什屬予序焉。既易簪。其子嘯奉遺命來蒼梧索墓表。予哀感而授之。茲復承筮箴之請。執筆以表懶齋之墓也。二公俱鄉里前輩。名稱於末世。而範垂於後人。予並附之。以垂不朽云。

墓表

十三

詩

貞節莫孺人三首

十四

早歲離鴛侶。晨昏強自持。箇中惟欠死。此外更何思。盟誓山丘重。貞心天地知。昭昭青史內。千古令名垂。

偕老平生願。那堪喪所天。粧臺春夢冷。玉頰淚痕鮮。勁節丹心炳。孤身白髮堅。彤庭旌節下。奕禩姓名傳。

一自良人逝。冰霜苦自持。紅顏身不死。白壁行無疵。鏡裏鉛華謝。胸中鐵石期。覆舟身不沒。節孝有天知。

送周清溪先生福州司訓

周君金錫姿。煨鍊承趨庭。靖江輔以立。武昌翼以行。工曹仗胸臆。蘭玉播休聲。教子聽鹿鳴。雲端高奮騰。知君不出家。巋然四教成。父母稱其孝。友弟稱其兄。峻嶒鄧林樹。皎潔崑山珩。古學貴踐實。今人多近名。至尊惟道德。軒冕銖塵輕。遙知勤秉錄。樂育魯諸生。

北 泉 草 堂 遺 稿

哭周岳父追憶前事並序

予家有田在山頭。將熟悉爲馬所侵。先封君命元守馬。元携孟子讀之。偶遇公過。因問姓名。親揭明堂章。使予背誦畢。復命講解。盡得書義。公因大歎賞。尋與先封君約爲婚姻。時予八歲。荆叔甫二歲。是爲弘治乙卯年也。

我本樛櫟姿。供奉冰玉清。言念八歲時。與公未識荆。高聲讀孟子。防馬踐田廛。公來予起揖。作意問姓名。手揭明堂章。詢我王政行。予既誦之遍。講義亦粗明。公大爲歎息。興宗良後生。荆斂甫二歲。已屬桃夭情。先君重交誼。即此訂昏盟。山頭亦紅葉。他年故事增。

自鹿車共挽。欲叨進瓊席。文場聲譽起。期予破天荒。庚午年大比。秋闈舉於鄉。計偕將北上。厚贈充行裝。愛我所生。期望大顯揚。甲戌捷南官。慰公與高堂。嘖嘖聽人言。稱公眼力長。職授行人司。乞假歸稱觴。方圖報寸草。誰料厄黃楊。悠然乘化去。曷禁心悲傷。

詩

過丈人墓有感而作

泰山歎其頽。遺蛻埋黃腸。宿草覆如被。封石磊若堂。凄其追往行。忠信篤耕桑。貽子孫以安。遠慕襄陽龐。昔別公尙健。勉我事君忠。今歸公不見。淒淒白楊風。勝地龜浮水。長眠首丘東。年年墳前拜。漸長一孫龍。

挽冬官周務齋先生三首

歸與遠行棹。拜君新構堂。隔語尙欸欸。臥病原在房。謂言不日好。並坐絃暄涼。何竟朝聞訃。淒兮夕感傷。君上尙有母。膝下未生郎。平生忠孝節。一夜共琴亡。

少小共闔閭。抱璞自綺齡。君年十一二。誦讀通五經。靖江知令器。愛擬玉生庭。督學稱佳士。高翔振鳳翎。果爾南宮捷。部曹揚芳馨。誰知藜閣暗。天上隕文星。

同友天下士。斷金二人心。君心如日月。流光照我襟。共期百年內。事業耀亢參。何遽騎箕去。黯淡白雲深。我如孤飛鳥。求友慕遺音。小豚依玉樹。兼葭託寸忱。

詩

案以下諸詩原集不載
係從何忘集補入

游蜂歎

日出蜂亂飛。花落春初歇。夜來風雨多。枝頭子初結。徘徊青山隅。群芳甯可掇。欲向泥中求。猶恐蒙不潔。物態無終窮。天道有生滅。功成身乃退。何事中腸熱。

立鶴篇

西臺歲去徂。獨立撫孤松。仰盼丹闕迴。□□立鶴侗。立鶴如訴言。感之側余衷。冥鴻遼北渚。振翮集西雝。飛揚各乘運。翮翮厲高空。潔身豈離羣。澹素乃無庸。留踪破苔綠。露滴懸朱紅。永嘆奮清夜。朗月何虛融。照此哀怨深。耿耿殊未窮。亨嘉多夙遘。屯溺鮮英雄。形以落魄醜。長鳴向蒼穹。願祈圓景光。恒與今日同。月不去天上。鶴不老樊中。

詩

十七

樵溪行送鄭一鵬給諫

湖泖水流雲霧中。江翻急浪奔長虹。君侯覽之動高思。悠然若破馮夷宮。披
鞭斷河洛。挂劍倚崆峒。松舟檣楫乘長風。棹歌依依明月小。帆影落落青天
空。三山鄭子好狂者。夷游海內靡所同。羨君高雅。爲君和衷。百年意氣多
豪雄。密粟奏西轡。喬島度南鴻。飛飛野雉春桑中。君胡爲乎去歲朝京師於
千里。拜舜華而九重。答爾陵之嘉命。奏蒲長之膚功。扁舟信于邁。落日吾
追踪。萬山雲來意不極。一尊酒盡情無窮。君亦不能語。吾亦不能從。忽聞
前峯戰雷雨。乍驚別浦吟蛟龍。琅玕叟。漁陽童。群走江上呼明公。寇恂初
爲不吾借。天閭高叫誰能容。長辭竟爾此黎赤。使我聞之爲中激。民愚而神
豈易得。道傍更有牽情者。楊柳依依漫垂碧。丈夫所志在經國。期使四海皆
衽席。百里原非人賢居。鸞皇豈可終棲棘。汎三江。浮七澤。愛爾喬騰萬里
翻。吁嗟乎。別離可悲。長何足惜。

贈竹園隱者

寂寂江村路。何煩命駕過。羊求忘地速。松竹到門多。野外常無酒。田間別有歌。洗杯深酌處。落日在滄波。

七夕立秋值雨

尊前紅雨飛南山。坐隔牛女河之間。越歲佳期應自合。一望蕭瑟總虛還。螢垂碧草疎簾靜。燕入深紅畫棟間。漫指白雲浮故國。忽因清夢落朝班。

游滴水巖

露澄盤紆鬱萬岑。碧山飛映翠華臨。鼉飛玉棟浮雲爛。鵲隱瓊巖對雪深。石頂有泉時滴滴。洞門無日晝陰陰。簿書多暇偏乘輿。潦倒尊中月滿簪。

送諸生小試遇雨

電掣雷鳴酣野戰。水吟龍嘯鬱雲興。山南月暗全無路。岸北沙明僅有燈。海

詩

內英豪今並起。江中波浪此憑陵。商霖□滿焦枯發。野色新添萬里青。

秋日 王龍津觀物園

碧苔山深草堂潔。王子情□野興悠。□竹烟霞凝玉□。萬松風露接清秋。放歌劇飲不盡意。落日出林還泛舟。山童載酒更呼酌。天畔雷鳴翻白鷗。

呂梁洪

呂梁之險亦奇觀。峭壁驚濤走萬灘。楚窳吳樯天上度。朔雲燕樹鏡中看。日黃山閣湖光鏡。雪白江村草色寒。隔岸鞦韆喧不歇。桃花開遍曲闌干。

春日阻風部中限韻

白晝日黃天欲浮。燕城三月似高秋。濤生宮掖沙驚樹。花覆苑牆春隱樓。朝馬不嘶金勒斷。寒鴻無路到關愁。卻思豐沛有遺恨。猛士彫殘蔓草稠。

陳子達院中賞榴限韻

北 泉 草 堂 遺 稿

露冷天階銀燭清。絳榴飛影斗間橫。繁花媚已酬嘉節。多病愁兼劇世情。十里層臺齊月上。二城悲角繞雲生。與君未是清狂客。莫漫金尊盡夜傾。

晚霽謁張永南翰讀歸復簡此

宿甫不淹□□□。晚涼堪曳玉堂裾。朱籬靜度燕山色。碧構清涵太史書。傾蓋幾回瞻相業。虛襟終日對文儒。臨風漫省瑤華造。欲報瓊英愧不如。

聞警和顧心新三問

遼海風波偃將旗。狂奴操刀弄演池。游魚釜熱應難久。縛虎籠深恨不支。營壘十年空節鉞。羽書千遍乞王師。請纓有志長沾臆。擊節終軍□爾爲。百年遼左號精兵。負險誰知氣益橫。一鼓日中飛炮火。三軍帳下拔霓旌。不聞西賊憂韓老。猶自長沙哭覃生。近事大同姑勿論。往年甘肅悔行成。六月王師曉出征。將軍李廣舊知名。燕然今去承推轂。天討由來是應兵。萬里若能襁逆膽。此生真不愧虛行。乘時勒石非難事。急爲長楊一請纓。

詩

北 泉 草 堂 遺 稿

詩

病中立秋

三伏初收展病扉。夜深風露漾霏微。碧梧已應金空落。大口新隨斗指飛。燕倦客思遠綠野。蓮知老卒褪紅衣。玉簫萬里堪腸斷。何處滄洲映紫微。

樂耕堂

源頭活水溢平川。桃色花香總自然。海上疑成眞世界。人間誰信不神仙。棋驚宿鳥搖深竹。歌遏行雲入九天。良會莫教輕住別。每逢流水惜芳年。

倭犯鍾司徒墓雷震遁去

既歸三尺樂斯堂。況有金函玉匣藏。誰謂蓋棺古定事。猶遺赫怒庇重岡。丹忱貫石塋俱古。赤電明心中亦蒼。千載智愚都幻化。到來賢哲自洋洋。案

上二詩從府志補入

題峽山飛來寺

畝中奇勝擬蓬萊。想是當年欲建臺。天恐此方銷土木。故令神物特飛來。案此詩從粵東文獻補入

貞節周母莫孺人

寶鏡鑿分四十年。魂飛孤塚鎖雲煙。水霜節操共姜苦。鐵石肝腸令女堅。萬古綱常天地久。一生貞白鬼神憐。朝廷有意敦流俗。早晚褒書下九天。從文

山周氏族譜補入

午日卓明堂議修築北冲河口

五指參天五嶽呈。四州導水四山傾。地脉不緣滄海斷。中原垂盡覩全瓊。特起崑崙浮浩瀦。居然福地擬蓬瀛。鴻荒世遠不可辨。唐虞聲教朔南并。郡縣開疆始秦漢。輿圖一統歸皇明。王旨一從褒甸服。珠厓千古表神京。海濱絃誦追鄒魯。天上夔龍翊治平。鄉里衣冠今不乏。登高遠望幾含情。爰稽往牒紀圖讖。大魁五解須彙征。數過時考今則可。後有作者誰先鳴。北冲河口尙

詩

詩

二四

未塞。女媧補煉湏經營。裁成輔相固有道。望景觀卜希前旌。弱齡荏苒今衰
晚。去來吾黨欣逢迎。維時天中際佳節。嚶鳴求友選羣英。蒲觴綵縷紛競
勸。玄談四座俱高聲。就席探韻陳風雅。稽首神天爲主盟。卓明堂前一
杯酒。上帝胥蟹一墻羹。肝膽鑄銘諧楚越。市義好德垂休名。從此山靈增色
色。風雲際會符嘉禎。五百名世應時出。三千禮樂對縱橫。政善民安歌道
泰。風調雨順號時清。雍熙世擬華胥國。蠻荒時築受降城。逸史歷歌摘蘇
句。載稱奇絕冠平生。